

■ TRIBUNA POLITICA

Bondo, protecziun civila e solidaritad

DA CHRISTIAN RATHGEB,
CUSSEGLIER GUVERNATIV

La fin d'avust è capitada da Bondo ina catastrofa da la natira da dimensiuns giganticas: Al Piz Cengalo en la Val Bondasca hai dà ina bova immensa. Trais milliuns meters cubic crappa èn ramplunads a val. Igl ha dà morts e blesads e gronds donns materials, e las forzas da segirezza èn stadas sfurzadas d'evacuar il vitg da Bondo. Pli tard hai dà ina segunda bova che ha chaschunà ulteriuras destrucziuns, e las autoritads han stuì engrondir anc ina giada la zona da privel.

Sco directur da segirezza responsabel hai jau pudì far al lieu in maletg da las dimensiuns da la catastrofa ed jau sun stà profundamain consternà. Ils eveniments tragics a Bondo ma mussan en quest cas ina giada dapli la gronda professionalitad da tut las forzas da segirezza partecipadas, ed jau sun stà impressiunà da lur engaschi. I ma stat a cor d'engraziar en quest lieu a tut las gidantras ed a tut ils gidanters per lur grond engaschi e per lur sforzs.

Al cumenzament sut la direcziun da la polizia chantunala dal Grischun, lura cun l'uffizi da militar e da protecziun civila, ma adina sut l'egida da la vischnanca, è vegnì e vegn collavurà energicamain a Bondo per che la populaziun locala survegnia uschè svelt sco pussaivel l'agid ed il sustegn necessari. En spezial vuless jau er undrar la vischnanca da Bregaglia senza. Ella n'ha mai dà giu l'egida, quai ch'è spezialmain admira-



bel en vista a la gronda situaziun d'urgenza ed als problems ch'èn da schliar. In engraziament tut spezial tutga qua a la presidenta communal da la vischnanca da Bregaglia, Anna Giacometti, ch'è – dapi la fin d'avust – permanentamain en acziun.

Ils eveniments a Bondo han mussà ina giada dapli: I dovra ina ferma protecziun civila per dumagnar en situaziuns d'urgenza extraordinarias las incumbensas ch'èn da schliar. Che quai sajan auas grondas, bovas, epidemias u outras catastrofas che chaschunan donns devastants: Sche la populaziun grischuna vegn en situaziuns d'urgenza è la protecziun civila al lieu ed è en cas da prestar agid efficaciz e professional. En spezial er areguard la structura da direcziun han pudì vegnir rimnadas a Bondo experientschas positivas cun la nova lescha davart la protecziun da la populaziun ch'è en vigur dapi il 1. da schaner 2016.

Ensemen cun la polizia, Ecun ils pumpiers, cun ils fatgs da sanadad e cun ils manaschis tecnicos è la protecziun civila ina da las

tschintg pitgas da la protecziun da la populaziun. En cas d'eveniments grevs che duran ditg è la protecziun civila la suletta organisaziun civila che po sustegnair, rinforzar e distgargiar a lunga vista las autras organisaziuns. La protecziun civila è svelt pronta a l'acziun ed è perquai ina partenaria indispensabla da la protecziun da la populaziun en noss chantun.

Ivegn anc a durar ditg fin che la populaziun da Bondo e fin che la Val èn sa remessas dals eveniments da l'avust passà. Mo gia las lavurs da rumida e da reconstrucziun vegnan a durar onns. Al lieu vegni pia ad esser anc ditg ina situaziun speziala che vegn a signifitgar ina gronda grevezza per la populaziun. Per finir vuless jau numnar qua la gronda solidaritad ch'è medemamain sa mussada en connex cun la catastrofa da la natira a Bondo.

Tant la populaziun dal Grischun sco er l'ulteriura populaziun svizra han garantì ina gronda summa da daners da donaziuns. En la Val sa gidan e sa sustegnan ins energicamain, per exempel cun metter a disposiziun spazi d'abitar. Sco ulterior segn visibel da la solidaritad cun Bondo vuless jau menziunar l'acziun «Bondo con amore». L'interpresa Print Stick da la Val Müstair ha creà giaccas cun l'inscripziun «Bondo con amore», e per mintga giacca vendida vegn ella a far ina donaziun da 10 francs. In bel exempel da solidaritad viva – grazia fitg er per quella.